
TE HEHEURAA API

I neia i te piha neneiraa no te Ekalesia a Iesu Mesia i te Feia Mo'a te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farani i te matahiti hoê.

Nu. 8

Novema, 1919

Mat. 13.

"E o te parau mau ra o te ite ia i te mau mea e vai nei, e te vai na, e o te vai a muri atu." B.F. 93:24.

"E iteraa hoi te hanahana no te Atua, oia hoi, te maramama e te parau mau." B.F. 93:36.

"E ite ia outou i te parau mau, e na te parau mau outou e faatiamâ." Ioane 8:32.

IA TAHOE OUTOU E MAITAI AI.

Ia tupu hoê noa te hoê tumu raau oia a'nae ra, e ûhia ia oia e te mata'i e te vero, e maruarua'i ia to'na mau rauere, e e ore ai to'na mau amaa e toro i nia, e taupe râ i raro mai te mea ra e, te imi noa ra ia i te repo.

Ia tupu hoê noa te hoê raau rii mai te paruru-ore-hia i te veavea o te mahana, e hoene atura ia te tupu raa e e oriorio roa a'era.

Ia parahi hoê noa te hoê taata oia ana'e ra na te mana o te inoino ia oia e haataupe i raro i te repo, e te mau ravea rii tauturu no'na ra e pau ia i te veavea o te feia rarahi e te nounou moni.

No reira, eiaha outou ia riro mai te tumu raau te huru e te raau rii o te tupu hoê noa. A amu râ outou, e a tauturu outou, e a paruru outou te tahi i te tahi mai te au tahoê te mana'o.

Mai te mea e, e faaamaha noa outou ia outou iho e eita outou e haamana'o maori râ ia outou ana'e iho tataitahi; eiaha ia outou e mana'o e, e roaa ia outou, maori râ te mau-iui, te ati, e te hamani ino.

O tei hea te mea ora te hau i te paruparu e te paruru-ore-hia i te mau mana rii maue o te reva! Area râ ia tae mai te mau manu taehae o te reva, e haaati ia ratou ia'na a tiahi atu ai ia ratou. E ia riro te reira ei tapao e ei hi'o-maite-raa na tatou nei.

Te manu e taa ê i to'na mau hoa o tei mata'u hoi o te pee ia'na i to'na haerea, o tei parahi i pihai iho i te taime e haamaha'i to'na rohirohi mai te ore e faarue ia'na a taoto ai oia.

No reira, mai te mea e. e uihia mai outou e, "Toohia outou?" e na ô atu ia outou e: "Hoê matou no te mea e, o ta matou mau taeae, o matou ia; e o matou nei, o ta matou mau taeae ia.

Aita te Atua i faatia i te tahi pae ei feia rarahi, e te tahi pae ei feia haehaa e te tahi atoa pae ei tîti, e te tahi atu pae ei fatu. Ua hamani Oia i te taata ia hoê â ratou.

E mea hau râ te tahi pae i te puai, aore ra i te mana, aore râ i te itoitoe; e ia ore to ratou arofa i ta ratou mau taeae, no te teoteo e te nounou tao'a, e titau ia ratou e faaauraro ia ratou e e faatîti ia ratou.

Ua ite atea te Atua e, e na reira ratou e ia ore ratou ia na reira i faaue ai oia i te taata e, e arofa te tahi i te tahi. E mai te mea e, na arofa te taata te tahi i te tahi, ua amui-mau-hia ia ratou.

Te tere ra te hoê taata na nia i te mou'a e ua tae atu oia i te hoê vahi i api ai to'na e'a i te hoê ofai rahi tei vai i roto i te purumu ra. Aita'tura a'na e ravea e tamau atu ai i to'na tere no te mea e, ua api roa to'na e'a i taua ofai ra, e aita ta'na i nehenehe ia haere na te pae aui e na te pae atau.

I te iteraa taua taata ra e, eita ta'na e nehenehe ia haere â i to'na tere no taua ofai ra, tamata ihora oia i te turai atu i taua ofai no nia i te purumu ra, ia nehenehe ia'na ia haere â i to'na haerea. Rohirohi roa 'era oia, e aita hoi i manuïa ta'na ohipa i rave no te teiaha rahi o tana ofai ra.

I te iteraa oia i te reira, parahi ihora oia i raro mai te oto to'na aau; e ua na ô a'era: "Eaha ra to'u hopea auanei ia tae i te po, ia ati au i teie nei vahi moemoe rahi! Aita au e maa e te taотораа, e aita atoa ta'u e paruru i te hora e haere mai ai te mau puaa taehae i te imiraa i ta ratou maa!"

E a feruri noa'i oia i te reira, i haere atoa mai ai te tahi ratere. Ua tamata ihora oia i te turai i te ofai mai te taata matamua;

E rohirohi atoa ihora oia, parahi a'e ra i raro mai te taupe i te upoo i raro.

I muri a'e i taua na taata toopiti ra, haerae atoa mai ra te tahi atu mau ratere e aore e taata i rotopu ia ratou o tei mae ia'na taua ofai ra. E mata'u rahi hoi to ratou i te mau mea atoa.

Maoro rii a'era ratou i reira, parau maira te hoê o ratou, na ô maira: "E tau mau taeae e, ia pure tatou i te Atua ia riro e, e tauturu mai oia ia tatou i roto i teie nei ati."

Ua farii atura ratou i ta'na parau, pure ihora ratou ma te aau tae i te metua o te parahi i te ra'i.

E ia oti a'era ta ratou pure o te taata i faaue e, "a pure" ua parau faahou atura ia ratou mai te na ô atu e "E tau mau taeae e, o vai te ite e, e ore anei e mae ia tatou atoa te ohipa te ore e mae i te hoê o tatou."

Tia ihora ratou atoa i nia, tamata ihora i te turai i te ofai, mae a'era taua ofai ra hurihia'tura e ratou no nia'tu i purumu ra. Haere atura ratou i to ratou mau haerea mai te hau.

O te ratere ra, o te taata ia; te tere ra, o te oraraa ia; o

te ofai ra o te mau fifi ia, e te mau peapea e ati noa'i te taata i to'na haerea.

A ore roa e taata e mae ia'na taua ofai ra, ua faaau ra te Atua i to te ofai teiaha e ore ai te feia tere amui noa eroo-hia'i e te ati.

“E AO TO TEI MARU, E RIRO IA RATOU TE FENUA.”

E mea hiuaaro-rahi-hia te fenua mai tahito mai â; no te mea e, aita'tu e nohoraaa au maitai no te taata nei. Ua faatia te tahi mau taata i te parahiraa i roto i te miti e ua parahi ratou i reira. E ere râ ia i te mea au i te natura taata nei; ei nia iho â te taata i te fenua noho ai e tia'i. Na roto i te mau ravea maramarama a to te ao nei, e nehenehe ai i te taata ia parahi e maa taime rii poto i roto i te reva, aita râ e nehenehe ia'na ia haamaoro i reira no te mea e, e ere no'na te reira ei parahiraa. Ia mana'o tatou i te mau vahi te vai nei, oia hoi, te reva, te miti, te fenua, e te pape noa'tu, aita atu ia nohoraa e tano no te taata nei maori râ te fenua ana'e. Inaha hoi, ua haamauhia e te Atua te fenua nei ei parahiraa no te taata.

I ta'u mau ratereraa na teie nei mau fenua rii no te moana nei, e rave rahi a'enei a'u mârôraa fenua i ite i rotopu i te mau taata maohi nei. Ua patoi pinepine te mau fatu fenua te tabi i te tahi i te parau no te paparaa tupuna, te vahi mau i vai ai te otia, e na vai i tanu i te haari i nia iho i te fenua i mârôhia ra, Te ite nei hoi tatou e, aita te fenua i riro â na i te mau taime atoa i tei maru to'na aau. Ua riro râ ia te tahi mau taime, i te taata tei etaeta to'na aau i te ravea aravihi haavare, e i te parauraa i te parau faaheporaa. I roto i te tahi mau mârôraa, te roaa nei te fenua i te taata tei manuia i te imiraa i te paari maitai i te ohipa pi'o. No reira, ua papu ia ia tatou e, e ere tei teie nei anotau e fatu noa'i te feia maru i nia i te fenua; ei tera'tu tau râ ia.

Ua faaite atea mai te mau peropheta tahitio i te hoêtau maitai e te mauuruu: Isaia 2: 4. Ei reira e maitai ai te maru e e riro hoi ia ratou te fenua; no te mea e, o te Atua iho te faataa i te parau ia ratou e eita te haavare e upoo-tia i mua ia'na. Te faaite maira te Atua i te huru o te ohipa no taua anotau ra, na roto i te vaha o Ioela; te na o maira oia e: "E mairi a'e i te reira e ninii atu ai au i tau varua i nia i te taata atoa; e tohu hoi ta outou mau tamarii tamaroa e te mau tamahine; e taotootoahia mai to outou mau taata paari, e ite to outou mau taata a'f'i i te orama: e ninii atu vau i tau varua i nia i te mau tavini tane, e i nia i te mau tavini vahine, ia tae i taua anotau ra." (Ioela 2:28 29).

No reira, e hoa ino ma e, eiaha e mârô noa i te fenua ma te parau tia ore ra. E upootiaraa rii poto noa iho to te haavare; e riro mau hoi te mau faufaa i roaa na roto i te reira ei anatema i nia i te fatu ra. A faaitoito i te haapao i te Evanelia mau a te Atua. E mai te mea e, e na reira tatou, e noaa ia to tatou tufaa i te fenua nei ra.

TE METUA E TE TAMAITI.

I roto i te mau papairaa mo'a, ua rau te auraa o te parau "Metua", oia hoi, te i'oa no te Atua. No reira, ia faataa-maite-hia, e ia haapapu-maite-hia taua mau auraa ra e tia'i.

Te faaite papu mai nei te Parau a te Atua e, e mea fanauhia mai te mau varua a te taata nei, no ô mai i te Atua, te Metua o Iesu Mesia ra; e to'na ra i'oa mo'a, O Elohimia. Te na ô maira te epitutore i te Hebera e, "E e metua hoi to tatou to te tino nei, o tei a'o mai ia tatou, e ua faaiti hoi tatou, eiaha ia rahi atu to tatou auraro i te Metua o te varua nei, e ia ora'tu? Hebera 12: 9. O te reira ana'e iho te tumu i na ô atu ai Iesu i te haapiiraa i te pure e, "E to matou Metua i te ao ra; ia raa to oe na i'oa."

Ua parauhia Iesu te Metua, e te Tamaiti hoi. Te na ô mai ra Iesu e, "Inaha, O Vau O Iesu Mesia. O Vau te Metua e te Tamaiti." Etera 3: 14. E Tamaiti fanau Iesu na Elohimia

i te varua e i te tino hoi. O Oia to Iesu metua i to'na fanau-
raa i te ao varua, e i to'na ra fanauraa i te fenua nei.

Te piti o te auraa no te parau Metua "O Tei Hamani"
ia; mai te au i te mau irava o te haapii mai e, O te Atua te
"Metua o te mau ra'i e te fenua nei e te mau mea atoa i roto
ra." Etera 4: 7; Alma 11: 38, 39; Mosia 15: 4.

E ere te Atua te Metua fanau o te ao nei, te mau mea
ora-ore e te mau raau e te mau manu, e metua râ Oia no
taua mau mea ra, no te mea e, na'na ratou i hamani. No reira
ia taio tatou i te mau irava parau o tei haapii mai e, o te
Atua te Metua no te ra'i e te fenua e te mau mea i roto ra, e
taa ia ia tatou e, "O tei Hamani" te auraa o te parau Metua
i reira, eiaha râ metua fanau.

No reira Iesu Mesia, o lehova, te Tamaiti no Elohimi
parauhia'i "te metua mure ore mau," (Mosia 16:15), e "te
metua no te ui a muri atu." Isaia 9:6; 2 Nephi 19:6.

Ua hamani lehova, (O Iesu Mesia), i teie nei ao i raro
a'e i te faatereraa a tona metua, o Elohim; e no te mea e,
e huru mure-ore to te mau mea i hamanihia e ana, e tia roa
ia parau e, o te Metua mure ore Oia no te mau ra'i e te fenua
nei.

Te tahi tumu Iesu i parauhia'i te Metua, no te mea ia e,
ua horoa to'na Metua i te hoê mau tamarii no'na ra. Hou
rii a'e i to'na tomoraa i roto i te ô o Getesemane, ua tau atu
Iesu i to'na Metua, no te mau pîpî tei horoahia mai na'na e
te Metua. Ioane 17: 6-12, 20- 24.

Te na ô maira te Fatu, O Iesu Mesia, i tana mau tavini
parautia i te tau hopea nei,

"Inaha, e tamarii-rii outou e ore hoi e tia te mau mea
atoa ia outou i teie nei; ia tupu â hoi outou i roto i te aroha,
e i te ite i te parau mau. Eiaha e mâta'u te mau tamarii-rii,
no'u hoi outou: ua riro hoi te re no teie nei ao ia'u, e no ô
nei hoi outou no ta ta'u Metua i horoa mai na'u ra; e e ore
roa hoi te hoê no ratou o ta ta'u Metua i horoa mai na'u ra
e moe; hoê â hoi maua e te Metua." B. F. S. 50: 8.

Hoê uoaiho ravea e noaa mai ai te ora mure ore oia hoi, na roto i te haapaoraa i te man ture e te man oroa o te evanelia nei; e te taata atoa tei na reira, e riro ia ratou ei mau tamarii tamaroa e ei mau tamarii tamahine no te Atua. Te na ô maira te Fatu i te hoê o tona mau tavini i te tau hopea nei e, "E ta'u tamahine, inaha, te parau atu nei au ia oe, o ratou atoa o te farii mai i ta'u evanelia ei tamarii tamaroa ia e ei tamarii tamahine i roto i to'u ra basileia." B.F.S.25:1.

E rave rahi te mau heheuraa tei faaite mai ia tatou e, ei na roto i ta tatou haapaoraa i te mau ture o te evanelia e riro ai tatou ei mau tamarii no Iesu Mesia, e no reira ei tamarii atoa hoi no tona Metua, Teie te tahi o taua mau heheuraa ra. B. F. S. 10: 12; 34: 1 3; 35: 1-2; 39: 1-4; 47: 7-8.

Ua parau atoa-hia te mau taata hara e te haapao ore. "e mau tamarii no te Diabolo." E ere râ ratou i ta te Diabolo i fanau, na roto râ i ta ratou raveraa i te ohipa iino e te hara i riro ai ratou ei tamarii no'na ra. E feruri tatou i te parau a Iesu i te hoê mau taata hara, te na ô atura oia e,

"Ua parau maira ratou ia'na, na o maira, O Aberahama to matou metua: ua parau atura Iesu ia ratou, Ahiri outou e tamarii na Aberahama ra, e haapao ia outou i ta Aberahama ra parau." "Te haapao na outou i te parau a to outou ra metua. Ua parau maira ratou ia'na, E ere matou i ta te faaturu i fanau, hoê â o matou metua o te Atua." "Ua parau atura Iesu ia ratou, Ahiri o te Atua to outou metua ra, e hinaaro mai ia outou ia'u, no reira hoi au nei, mai reira mai au i te Atua ra, aore hoi au i haere noa mai, ua'na hoi au i tono mai nei." "O te diabolo to outou na metua, i faatia'i â outou i te hinaaro o to outou metua ra: e taparahi taata oia mai te matamua mai â: aore oia i haapao i te parau mau, no te mea aore e parau mau i roto ia'na. Ia parau oia i te parau haavare ra, ua parau ia i te parau au ia'ua ihora, e haavare oia, e e metua hoi no te haavare." Ioane 8: 39, 41, 42, 44.

No reira i parauhia'i Satani te metua no te mau taata hara ra. Ua haapii-pupu-hia hoi te reira i roto i te parapore no te Zizania. Mataio 13: 38.

E nehenehe i te taata ia faatamarii ia'na iho ia Iesu Mesia, na roto i te fanau-faahou-raa. I Ioane 3: 8-10. No ratou, o tei fanau iana, na roto i te haapaoraa i te mau ture no te evanelia, i te tamau-maite-raa e tae noa'tu i te hopea; te parau ta'na i na ô ra e, "No reira i papaihia ai e, e mau atua ratou, oia hoi te mau tamarii na te Atua." Riro noa'tu râ ratou ei mau Atua, ei raro iho â ia ratou i to ratou metua, ia Iesu Mesia; e no reira, te taio nei tatou e, "No te Mesia ho'i ratou e na te Atua hoi te Mesia."

Na roto i te fanauraa apî i te pape e te varua e riro ai te taata ei tamaru no Iesu Mesia B. F. S. 76:3; 1 Kor. 4:15.

E mai te mea e, e tia ia parauhia ratou o te farii e te hapao i te evanelia, "e mau tamarii no Iesu Mesia," e ere anei ia i te mea tia ia parau atoa hia Iesu e Metua no te feia parautia.

No te mana i horoahia na Iesu e to'na metua O Elohima i riro ai oia ei Meïua. Te tahi tumu Iesu i parauhia'i te Metua, no te mea ia, ua riro Iesu ei mono no to'na Metua O Elohima, na roto i ta'na mau ohipa i rave. Te na ô mai ra Oia i te Ati Iuda ra e, "O vau e te Metua ra, hoê â ia." Ioane 10: 30;

"Ua ore au ua parahi i teie nei ao; e tia râ ratou i teie nei ao, e te haere atu nei au ia oe na. E tau Metua Mo'a ra e, e tia i oe ia ratou i ta oe i ho mai no'u i to i'oa na, la hoê a'e ratou mai ia tâua atoa nei â.

E ua horoa vau i te hinuhinu na ratou i ta oe i ho mai no'u ra, ia riro ratou ei hoê mai ia tâua hoê nei," John 17-11, 22.

E no reira ua tuu mai te Metua, O Elohima i to'na ra i'oa i nia i te Tamaiti; e ua parau Iesu, e ua rave hoi oia i ta'na atoa ra mau ohipa, i roto i te i'oa no te Metua; e ta

Iesu mau ohipa e ta'na ra mau parau, o te mau ohipa maoti ia e te mau parau hoi na te Metua.

Te faataa nei te Bibilia e; ua tuu te Atua i to'na ra i'oa i nia i te hoê melahi tei tonohia ia Iseraela i te tau no ta ratou faarueraa ia Aiphiti. Teie te parau a te Fatu i to Iseraela, no taua melahi ra, "E ara oe iana, e faaroo i tana parau, eiaha e faaoooo atu i ta'na, e ore hoi oia e faaore mai i ta oe hara no te mea tei ia'na to'u nei i'oa." Ex. 23: 21.

Ua tae atu te hoê melahi ia Ioane pipi-here, e parau atura oia ia'na i roto i te i'oa no te Mesia, mai te mea ra e, o te Fatu iho oia. A hio i te Apokalupo 1: 1, 8. Oi haamori Ioane i taua melahi ra no te mea e, ua parau te melahi ia'na ma te i'oa o Iesu. Faaore atura râ te melahi ia'na, na ô atura, "Ua parau maira oia ia'u, Eiaha roa, e taetaeae tavini hoi au no oe, e no to mau taeae i te mau peropheta ra, e no te feia i haapao i te parau i roto i teie nei buka; o te Atua te haamori." (Apokarupo 22: 9.)

Ua tuu ê na Iesu Mesia, te Fatu hanahana i to'na i'oa i nia iho i taua melahi ra ta'na i tonomaiia Ioan, e ua parau te melahi ma to Iesu ra i'oa.

Aore te hoê o te mau feruriraa i nia nei e faahuru-ê e hoe iti a'e i te parau mau no te fetiiraa i ropu ia Elohinia e ia Iesu hoi. O Iesu ra, o te matahiapo ia o te mau tamarii i fanau ia Elohimia i te ao varua. Na Paulo e faaite mai ia tatou i teie mau mea nei, te na ô maira oia e, "O te haru mau oia o te Atua hi'o-ore-hia ra, o tei fanau na i te mau mea atoa i hamanihia ra: na 'na hoi i hamani i te mau mea atoa nei, o to te ra'i, e to te fenua nei, o tei itea ia hi'o ra e tei ore i itea, te feia terono, e te feia hau, te huiarii, e te feia mana; e mea hamani-ana'e-hia ia e ana, e nona ana: e o muâ hoi oia i te mau mea atoa nei, e oia te mau i te mau mea atoa nei. E oia hoi te upoo o te tino ra o te ekalesia nei; o te matahiapo oia, te matahiapo o te feia i pohe ra, ia hau ê atu â oia i te mau mea atoa nei. E mea tia hoi i te Metua e ei roto ia'na te i i te mau mea atoa ra vai mau atu ai." Kolosa 1: 15-19.

Te haapii mai nei teie mau irava e, e matahiapo Iesu no te mau taata atoa i te ao varua ra. Ua ite râ tatou e, e ere Iesu i te taata matamua i fanau mai i te ao nei. O Iesu na hoi tei fanau mai mai te pohe maira oia hoi te matahiapo mai te pohe maira, aore râ te oho matamua o te tiafaahou-raa. 1 Kor. 15: 20, 21 23; Apokalupo I: 5; Ohipa 26: 23. I roto i te hoê heheuraa i hôroa-hia mai na roto i te Perophe-ta ia Iosepha Semita, te na ô mai ra te Fatu e," E i teienei, oia mau ta'u e parau atu nei ia outou, i ô te Metua ra vau i te matamua ra, o te Matahiapo hoi au; ie te feia atoa o te faafanau mai na roto ia'u ra, ua noaa a ia ratou te hanaha-na no reira mai, e o te etaretia ia no te Matahiapo." B. F. S. 90: 4.

Te haapii mai nei teie irava e, te ora ra tatou i te ao varua hou tatou i fanauhia mai ai i roto i te tino nei. No reira, e tia ia tatou ia paran e, O Iesu to tatou ia matahiapo.

Eiaha râ tatou ia ore ia haamana'o e, e mea hau roa'tu oia ia tatou atoa, no te mea:

1. E Tamaiti-Fanau-Tahi oia na Elohimia i te tino nei.
2. E Tamaiti oia no te hoê metua vahine tahuti e te hoê metua tane tahuti-ore e te hanahana.
3. Ua maiti-ê-hia na oia ei Faaora no to te ao nei, hou te ao nei i faatumuhia'i.
4. E mea porao-ore Oia.

E ere Iesu i te metua no te mau varua tei tae mai i te ao nei ia rave i te tino i'o e te toto, no te mea e, ua na rei-ra atoa ia Oia. E tamarii Iesu no Elohimia, mai ia tatou atoa nei te huru. Mai te au i te parau i heheuhia mai ia tatou e, aita e nehenehe i te varua ia fanau i te varua, e aita 'toa e ne-henehe i te taata tahuti nei ia fanau i te varua; ia roaa râ ia tatou te hoê tino tahuti ore e te hanahana, ei reira e nehe-nehe ai ia tatou ia fanau i te mau varua, E te mau varua o te fanauhia e te mau taata hanahana tahuti ore a muri atu, e roaa atoa ia ia ratou te hoê tino tahuti nei mai ia tatou a-toa te huru. E na roto i te tiafaahouraa e riro ai to ratou mau tino i'o e te toto, ei héiro hanahana tahuti ore mai to to ra-

tou ra mau metua tino atoa te huru.

Mau Parau Apî

Te opuahia nei te heruraa o te hoê apoo mai Baratane i Farane, na raro a'e i te miti tei ropu i na fenua ra. E tere te mau pereoo auahi na roto i taua apoo ra. E na reirahia hoi te tuatiraahia Baratane e Farane, e e haapotohia atoa hoi na roto i taua ravea ra, te tereraa o te taata mai te tahi fenua i te tahi fenua. E mea oioi te pereoo auahi, e mea tau-pupu te pahi auahi e te pahi taiê. E riro teie apoo ra eí haamaitairaa rahi roa ia Baratane e Farane e te mau fenua Europa. E haamatahia paha te heruraa o taua apoo ra i te tau oteuraa.

Te faaapi nei te hau Baratane i te oire Ierusalema e te mau vahi mo'a te faaho'ihia nei ia i to ratou ra huru mau. E huru api to te oire Mo'a i teie mau mahana nei. Te ite nei tatou i te rima o te Fatu i roto i taua ohipa maitai ra.

Te itoitoe nei te Socaiete Aniti-Avaava o te fenua Marite i te tama'iraa'tu i te cigareta. Teie to ratou titauraa, ia ore roa te puhipuhiraa avaava. E huru manuia hoi ta ratou ra ohipa maitai.

Te feruri nei te mau etaretia Porodesani e te mau etaretia Catolika Heleni i te amui-tahoê-raa o to ratou mau haapaoraa.

Te haamata nei te hoê mau vahine rave ohipa i Baratane, i te oomo i te piripou parata, no te raveraa i ta ratou ra ohipa.

Te haapii mai nei te hoê taote tuiroo no te oire Chicago e, "Te vahine o te hau to'na tamarii i fanau hou te maha ahuru e ma pae o to'na mâtahiti, ua hau atoa ia to'na matahiti i te ora raa i te ao nei i muri iho i taua matahiti maha ahuru e ma pae ra."

Aita â te mau Basileia i Europa i te hitia ô te râ i hau maitai te tahi i te tahi, e te tupu noa nei â hoi te mau orure-

raa e te mau tama'iraa puruunu i te mau fenua e rave rahi.

Ua tae atu te taata faatere pahireva O Rosa Semita (Ross Smith) i Autralia i te 10 no Diteina. A 11,500 mile te mao-ro o to'na maueraa, mai te fenua Baratane mai. Ua faarue oia i Baratane i te 12 no Novema.

Te tupu nei te toea o Iakoba, (oia hoi te mau Initia) i te rahiraa i te fenua Marite. I na matahiti e maha i pau a'e nei e pae ahuru tauatini Initia apî, i itea i te taioraa.

Teie paha te tumu no to ratou ra huru apî. "E te vai atura te mahana e riro ai ratou i te faaroo i ta'na ra parau, e i te ite hoi i te hape o te mau parau i tuhia mai e to ratou hui metua ra; e rave rahi hoi e faaorahia. E aroha mai hoi te Fatu i te taata atoa e tiaoro atu i to'na ra i'oa." Alma 9:17.

"E ia tupu noa'tu to ratou faaroo i te paruparu, na te Fatu e haamaoro i to ratou mau mahana, e ia tae i te tau i parau hia e to tatou hui metua ra, e e te peropheta hoi o Zenosa, e e te tahi atu â mau peropheta e rave rahi, oia te tau no te faaho'iraa i to tatou mau taeae ra, o te ati Lamana, i te ite i te parau mau;

"E, e parau atu vau ia outou e, no te tau hopea ra te mau parau a te Fatu i parauhia mai i to tatou mau taeae, o te ati Lamana; e roohia-noa-hia ratou i te mau ati e rave rahi, e haapurara-noa-hia ratou i nia i te fenua e hope roa'e, e e ha-haru-noa-hia, e tairihia, e e haapurarahia e ati noa'e, aore o ratou e haapuraa, na te Fatu râ e araha mai ia ratou;

E au teie i tei tohuhia mai, i tei na ô hia mai e, E arataihia ratou i te ite mau ra, oia te ite i to ratou Faacra, e to ratou Tiai mamoe rahi e te mau, e e amuihia ratou i ta'na ra mau mamoe.

No reira i parau atu ai au ia outou e, e maitai to ratou i to outou, ia ore outou ia tatarahapa." Helamana 15: 11-14

"I mua atu i te taeraa mai no te mahaua rahi no te Fatu ra, e ruperupe o Iakoba i roto i te medebara; e tiarehia hoi to ati Lamana mai te roti ra. E ruperupe o Tiona i nia i te mau aivi, e oaoa hoi i nia te mau mou'a, e haaputu mai hoi ratou i te vahi ta'u i haapao. B.F.S.49:5.